



Lehiaren
Euskal Agintaritza
Autoridad Vasca
de la Competencia

EBAZPENA (Esp.: 03/2013, GIPUZKOAKO PROKURADOREAK)

Osoko bilkura

María Pilar Canedo Arrillaga andrea, lehendakaria

Natividad Goñi Urriza andrea, kidea

Rafael Iturriaga Nieva jauna, kidea

Idazkaria: Ibon Alvarez Casado jn.

Bilbo, 2014ko uztailaren 17a

LABURPENA

I. AURREKARIAK	1
II. FROGATUTAKO GERTAERAK	5
III. ZUZENBIDEKO OINARRIAK	6
1. Prokuradore-lanbidea	6
2. Jakinarazpen Aretoak	7
3. Amaiera Konbentzionalaren lege-oinarria	8
4. Elkargoak aurkeztutako konpromisoak	9
IV. EBATZI DU:	11
Eranskina	12

Lehiaren Euskal Kontseiluak (aurrerantzean LEK), lehenago adierazi den osaerarekin, Elkargoak egindako ustezko lehiaren praktika murriztaileen ondorioz Prokuradoreen Defentsarako Elkarteak eskatuta Gipuzkoako Prokuradoreen Elkargoaren (aurrerantzean "Elkargoa") aurka hasitako Zehapen Espedientean honako Ebazpen hau eman du.

I. AURREKARIAK

1. 2013ko apirilaren 22an Lehiaren Euskal Agintaritzaren erregistroan Lehiaren Batzorde Nazionalaren idazki bat sartu zen, eta bertan Prokuradorearen



Defentsarako Elkartek Elkargoaren aurka egindako salaketa baten berri eman zen, Elkargoak egin dituen eta Lehiaren Defentsari buruzko uztailaren 3ko 15/2007 Legeak (LDL) debekatzen dituen ustezko jokabideen aurka.

Jokabide horiek honako hauek ziren: Gipuzkoan kolegiatuta ez dauden prokuradoreei Jakinarazpen Zerbitzuaren prestazioagatik kopuru bat ordaintzeko eskatzea.

2. Goian adierazitako gertakariei lotuta, Ikerketa Zuzendaritzak (IZ) 2013ko apirilaren 23an **informazio erresebatuko** izapide bat hasi zuen, LDLren 49.2 artikuluan xedatutakoaren arabera, zehapen-espeditente bati hasiera ematea bidezkoa ote zen erabakitzeko.

3. 2014ko urtarrilaren 20an IZk erabaki zuen Elkargoaren aurkako zehapen-espeditenteari **hasiera ematea**, LDLren 49.1 artikuluan aurreikusitakoaren arabera, goian azaldu diren gertakarietan lehiaren praktika murriztaileen zantzu arrazionalak ikusten dituelako. Interesatuei 2014ko urtarrilaren 23an jakinarazi zitzaizen espeditenteari hasiera eman zitzaiola.

4. LDLren aurkako ustezko **jokabidea** zera izango litzateke, Jakinarazpen Zerbitzua finantzatzeko kuota finko bat ezartzea aipatu zerbitzuaren erabilera kopurua kontuan izan gabe.

5. Espeditente honetan honako hauek dira **interesdunak**:

- Merkatuen eta Lehiaren Batzorde Nazionala.
- Gipuzkoako Prokuradoreen Elkargoa.
- Prokuradorearen Defentsarako Elkartea.
- I.R.E.

6. 2014ko otsailaren 4an LEAren Erregistro Orokorrean idazki bat sartu zen, Elkargoaren legezko ordezkariak sinatua. Idazki horren bitartez, Elkargoak eskatu zuen zehazpen-prozeduraren **amaiera konbentzionala** egiteko jarduerak has zitezen erabakitzea.

Eskaera hori 2014ko otsailaren 10eko Probidentziaren bitartez onartu zen. Gainera, zehapen-prozeduraren gehieneko epearen zenbaketa bertan behera utzi zen amaiera konbentzionala bukatu arte.

7. 2014ko martxoaren 31n Elkargoak bere **Konpromiso Proposamena** aurkeztu zuen, eta hori interesdun guztiei bidali zitzaizen komenigarritzat jotzen



zituzten alegazioak aurkezteko, eta alegazioak 2014ko maiatzaren 5ean eta 20an aurkeztu ziren.

8. 2014ko ekainaren 16an IZk jaso zuen konpromiso-proposamena ezetsi zuen eta Elkargoari beste epe bat eman zitzaion beste konpromiso-proposamen bat aurkezteko.

9. 2014ko ekainaren 26an Elkargoak bere **Konpromiso Proposamen berria** aurkeztu du, zeina jarraian eta ebazpen honen Eranskin gisa zerrendatzen den:

Lehena.- Prokuradore bakoitzak prozeduretan egiten duen jardunaren ondorioz jakinarazpen-zerbitzua erabiltzeagatik ordaindu behar duen kontraprestazioa ezartzea honako metodologia honen arabera:

Prozedura judizial bakoitzaren araberrako jardunagatiko ordainketa-sistema bat ezartzea erabaki da, horretarako normalki sortzen dituen jakinarazpenen bolumena kontuan izanik, eta horretarako honako sailkapen hau egitea beharrezkoa da:

1. Jurisdikzio zibila eta merkataritzakoa
Prozedura Monitorioa, Ahozkoa eta Kautela Neurriak
Epaiketa Arrunta, Kanbio Epaiketa eta Betearazpenak
Hartzekodunen konkurtsoa
Borondatezko jurisdikzioa, ezkontza-jurisdikzioa eta gainerako prozedura zibilak
2. Zigor-arloko jurisdikzioa
Falta-epaiketak
Aurretiazko Eginbideak, Prozedura Laburtua eta gainerako prozedurak
3. Administrazioarekiko auzien jurisdikzioa
Prozedura laburtua, Arrunta eta Bereziak

Prozedura bakoitzeko ekarpena kalkulatzeko honako eragiketa hau egiten dugu:

Prozedura bakoitzean lerrun bakoitzeko jakinarazpenen batez besteko kopurua hartzen da.

Prozedura bakoitzeko jakinarazpenen batez besteko kopurua prozedura kopuruarekin biderkatzen da, era horretan jakinarazpenen guztizko kopurua lortuz.

Jakinarazpen-aretoetan aurrekontuan sartutako gastua kalkulatzeko den jakinarazpenen kopuruarekin zatitzen da, eta jakinarazpen bakoitzaren kostua lortzen da.

Kostuaren balio hori lerrun bakoitzaren batez besteko kopuruarekin biderkatzen da, baita dispersio-koefizientearekin ere, hori balego. Balio horiek unitatera hurbilduz prozedura bakoitzeko ekarpenaren kostua lortzen da. Azalpena:

Jkp = jakinarazpenen batez besteko kopurua lerruneko eta prozedurako

Pk = prozedura kopurua

JzK = Jakinarazpen Zerbitzuaren Kostua



Jkb = Jakinarazpen-zerbitzuaren kostu balioetsia

D ko = Dispertsio-koefizientea

EE = Esku-hartzeagatiko ekarpena

$$JzK / (Jkp * Pk) = Jkb$$

$$Jkb * Jkp * D ko = EE \text{ (unitatera hurbildua)}$$

Azalpenean balioetsitako datu estatistikoekin, Prokuradore bakoitzak prozeduretan egiten duen jardunaren ondorioz jakinarazpen-zerbitzua erabiltzeagatik ordaindu behar duen kontraprestazioa ezartzen da, honako eskala honen arabera:

a) Jurisdikzio zibila eta merkataritzakoa.

Prozedura Monitorioa, Ahozkoa eta Kautela Neurriak: 2 €

Epaiketa Arrunta, Kanbio Epaiketa eta Betearazpenak: 7 €

Hartzekodunen konkurtsoa: 12 €

Borondatezko jurisdikzioa, ezkontza-jurisdikzioa eta gainerako prozedura zibilak: 4 €

b) Jurisdikzio Penala.

Falta-epaiketak: 2 €

Aurretiatzko Eginbideak, Prozedura Laburtua eta beste batzuk: 3 €

c) Administrazioarekiko auzien jurisdikzioa.

Prozedura laburtua, Arrunta eta Bereziak: 4 €

Bigarrenena.- Jakinarazpenen elkargo-zerbitzua erabiltzeagatik Esku-hartzeagatiko Ekarpina ezartzeko sistema berria onartzeko aurkeztea Elkargoaren Batzar Orokorrari, LEAk dagokion Ebazpena ematen duenetik zenbatzen hasi eta 2 hilabeteko epean.

Hirugarrena.- Urtero, Elkargoaren Batzar Orokorrak, Gobernu Batzordeak egindako proposamenez, jakinarazpen-zerbitzua erabiltzeagatiko kontraprestazioaren zenbatekoa eguneratu ahal izango du lehen konpromisoan ezarritako metodologiaren arabera, eta beharrezkoa izanez gero, eta alde zuzenetik dagokion azterlana egin ondoren, prozeduren eskalak aldatu ahal izango ditu, jakinarazpen-zerbitzuaren autosufizientzia bermatzeko, sistemaren gastuen eta sarreren bilakaera kontuan izanik, eta justifikazioan azaldutako jarraibideak betez. Horretarako, berrikuspen horiek, onartuak izan baino lehen, Lehiaren Euskal Agintaritzari komunikatuko zaizkio alde zuzenetik, jakinarazpen judizialen zerbitzu telematikoaren inplementatzen ez den bitartean.

Laugarrena.- Jakinarazpenen elkargo-zerbitzua erabiltzeagatiko Esku-hartzeagatiko Ekarpina zehazteko araubide berria Batzar Orokorrak onartu eta bi hilabeteko epean aplikatzea, elkargoko finantzaketa-araubidean sartutako aldaketetara egokitu egin behar dela kontuan izanik.

Bosgarrena.- Batzar Orokorraren erabakia elkargoaren webgunean argitaratzea eta zirkular baten bitartez elkargokideei jakinaraztea; zirkularrean, esku-hartzeagatiko ekarpina kalkulatzeko metodoa eta Lehiaren Euskal Kontseiluak ematen duen Amaiera Konbentzionalaren Ebazpenaren testua osorik adierazi beharko dira.

Seigarrena.- Hartutako konpromisoak egikaritu direla egiaztatzen duen dokumentazioa Lehiaren Euskal Agintaritzara lekualdatzea, konpromisoak bete direla egiaztatzea.



10. 2014ko ekainaren 26an konpromiso-proposamena LEKra bidali zen jakinaren gainean geratzeko, baita interesdun guztiei ere, komenigarritzat jotzen zituzten alegazioak egiteko, eta alegazioak 2014ko uztailaren 4an eta 2014ko uztailaren 16an aurkeztu ziren.

11. Merkatuen eta Lehiaren Batzorde Nazionalak bere alegazioetan adierazten du aurkeztutako konpromisoek modu eraginkorrean eta argi eta garbi konpontzen dituztela aurkitu diren lehia-arazoak.

12. I.R.E. jaunak, bere izenean eta Prokuradorearen Defentsarako Elkartearen ordezkartzan, adierazten du LEAk konpromiso-proposamena ezetsi egin behar duela, Elkargoari eskatuz bertan "izena emanda ez dauden" prokuradoreei inolako kopururik ez kobratzea eskatuz, edo, subsidiarioki, Jakinarazpenen Zerbitzuagatiko kobrantza/ordainketa Prokuradore bakoitzak egiten duen erabilera efektiboari lotuta egoteko konpromisoa eskatzea, horrela, "izena emanda ez dauden" prokuradoreei jakinarazpen-egintza bakoitzeko 0,12 euro kobratuz.

13. 2014ko uztailaren 16an IZk LEKra bidali zuen Amaiera Konbentzionalako Erabaki Proposamena zehapen-espedientearekin batera.

Bertan, IZk uste du Elkargoak formulatutako konpromisoek aurkitu diren lehia-arazoak konpontzen dituztela, interes publikoa behar bezala bermatuta geratuz.

Horregatik LEKri proposatzen dio aurkeztu diren konpromisoak onartzen dituen Ebazpena ematea eta zehapen-espedienteari amaiera ematea amaiera konbentzionalaren bitartez.

14. LEKk, 2014ko uztailaren 17an egindako bilkuran, espediente honi buruz eztabaidatu eta epaia eman zuen.

II. FROGATUTAKO GERTAERAK

15. Elkargoa zuzenbide publikoko korporazio bat da, nortasun juridiko propioa eta bere xedek betetzeko erabateko gaitasuna dituena.

Helbide profesional bakarra edo nagusia Gipuzkoan ezarrita duten prokuradoreek osatzen dute, baita beste lurralde-barrutiren batean helbidea izanik elkargo horretan sartzea eskatu dutenek.

16. Elkargoaren 2010, 2011 eta 2012ko ekitaldietako "Memoria Instituzionala" kuoten zenbatekoa zehazten da, kontzeptuen eta eskainitako zerbitzu moten arabera bananduta:



- 2010 eta 2011: 138€ (38€ Jakinarazpen Zerbitzua; 100€ Elkargoko Kuota).

- 2012: 140€ (48,41€ Jakinarazpen Zerbitzua; 91,59€ Elkargoko Kuota).

Bestalde, 2013. urtean 2012. urteko kuoten zenbatekoari eutsi zaio.

Jakinarazpen Zerbitzuaren kuotaren zenbatekoa langileen soldaten eta kostuen dagokien zatia lan egiten duten elkargokideen kopuruarekin eta hamabi hilerokoekin zatituz lortzen da.

Jakinarazpen Zerbitzuagatiko kuotaren zenbatekoa ezartzerakoan ez da kontuan izan prokuradoreek eta prozedurek sortutako lan-karga.

17. Elkargoak egiaztatu du prozedura bakoitzean egiten diren jakinarazpen-egintzen kopuruaren zenbaketa zehatza egitea ahalbidetzen duen izapidetze judizialeko informatika-sistematik ez dagoela ezarrita EAEn.

Aukera hori posible ez den bitartean, Elkargoak EEren zenbatekoa prozeduraren arabera ezartzeko sistema bat proposatzen du, prozedura mota bakoitzaren arabera jakinarazpenen batez bestekoak abiapuntutzat hartzen dituen formula matematiko batean oinarrituz.

Formula horrek Jakinarazpen Aretoari zuzenean lotutako gastuak bakarrik hartzen ditu kontuan.

III. ZUZENBIDEKO OINARRIAK

1. Prokuradore-lanbidea

18. Auzitegietako Prokuradore-lanbidearen eginkizun nagusia edozein prozedura motatan parte direnen ordezkartza teknikoa da.

Prokuradoreen eginkizuna da, era berean, lege prozesalek esleitzen dizkieten funtzio eta eskumen guztiak betetzea justiziaren administrazio hoberako, prozesuak zuzen substantziazteko eta epaitegiek eta auzitegiek ematen dituzten epaiak eta gainerako ebazpenak efikaziaz betearazteko. Eskumen horiek zuzenean edo organo jurisdikzionalaren eskuordetzan har ditzake bere gain, aplikatzekoa den legeriaren arabera¹.

19. Auzitegietako prokuradore-lanbidea, **nahitaez kolegiatu beharreko** lanbidea da.

Tituludun lanbideei eta profesionalen elkargo eta kontseiluei buruzko azaroaren 21eko 18/1997 Legearen 30.1 artikuluan xedatutakoaren arabera, lanbide kolegiatuetan jarduteko ezinbesteko baldintza da dagokion elkargoko kide

¹ 1281/2002 Errege Dekretua, abenduaren 5koa, Espainiako Prokuradoreen Estatutu Orokorra onartzen duena, 305. zk. BOE, 2002ko abenduaren 21ekoa.



izatea bidezko den legeak hala ezartzen duenean. Horrenbestez, elkargo bateko kide izan beharra lege mailako arauen batean jasotzen denean bakarrik jo ahal izango da egokitza².

Hala eta guztiz ere, kolegiatzea nahitaezkoa den lanbideak Legez arautzen ez diren bitartean —eta hainbat lege zerbitzu-jardueretarako sarbide librea izateari eta zerbitzu horiek erabiltzeari buruzko Legera egokitzeko abenduaren 22ko 25/2009 Legearen laugarren Xedapen Iragankorraren arabera— indarrean jartzen den egunean indarrean dauden nahitaezko kolegiazioak kontsolidatzen dira³. Horregatik, modu iragankorrean bada ere, elkargo bateko kide izatea beharrezkoa den egoerak mantendu dira, arauan ezarrita ez egon arren, eta, beraz, maila egokiko arau baten bidez ezarritakoak ez izan arren.

Aztergai dugun kasuan, elkargo bateko kide izateko betebeharra abenduaren 5eko 1281/2002 Errege Dekretu bidez onartutako Auzitegiako Prokuradoreen Estatutu Orokorraren 10. artikuluan eta Gipuzkoako Prokuradoreen Elkargoko Estatutuetan (Justizia, Lan eta Gizarte Segurantzako sailburuaren 2008ko otsailaren 4ko Agindu bidez onartuak) dago jasota⁴.

2. Jakinarazpen Aretoak

20. Prokuradoreekin egiten diren komunikazio-egintzak auzitegiaren egoitzan edo Prokuradoreen Elkargoak antolatutako harrerarako zerbitzu komunean egiten dira. Zerbitzu horren barne-erregimena Prokuradoreen Elkargoren eskumenekoa da, legearen arabera⁵.

21. Jakinarazpenak jasotzeko zerbitzu komunari SERCYN (Servicio de Recepción de Copias y Notificaciones de los juzgados y Tribunales) deritzo, edo modu arruntagoan Jakinarazpenen Aretoa, eta kopiak lekualdatzeaz ere arduratzen da⁶.

Bere zereginak honako jardun hauetan zehazten dira: kausak jaso eta entregatzea; jakinarazpenak jasotzea eta entregatzea Epaitegietan; idazkiak lekualdatzea; jakinarazpen telematikoak jasotzea: zerbitzuaren eta zerbitzuari atxikitako langileen mantentzea; epean sinatu gabeko jakinarazpenak

² Tituludun lanbideei eta profesionalen elkargo eta kontseiluei buruzko azaroaren 21eko 18/1997 Legea, 1997ko abenduaren 11ko 237. zk. EHAA.

³ 25/2009 Legea, abenduaren 22koa, hainbat lege zerbitzu-jardueretarako sarbide librea izateari eta zerbitzu horiek erabiltzeari buruzko Legera egokitzekoa, 2009ko abenduaren 23ko 308. zk. BOE.

⁴ Agindua, 2008ko otsailaren 4koa, Justizia, Lan eta Gizarte Segurantzako sailburuarena, Gipuzkoako Prokuradoreen Elkargoren Estatutuak onartzeko dena, 2008ko martxoaren 18ko 55. zk. EHAA.

⁵ 1/2000 Legea, urtarrilaren 7koa, Prozedura Zibilari buruzkoa, 2000ko urtarrilaren 8ko 7. zk. BOE (aurrerantzean PZL), 154. artikulua.

⁶ Prozedura Zibilari buruzko Legearen 276. artikulua.



kontrolatu eta jasotzea; prokuradore bakoitzari jakinarazpenak bere kutxatilan uztea.

22. Prokuradoreak jakinarazpenak egiten diren Aretoetara joan behar du nahitaez, aurreko paragrafoan adierazi diren jarduerak modu telematikoan egiten ez diren bitartean⁷.

23. Gipuzkoan Elkargoak 6 Jakinarazpen Areto kudeatzen ditu, beste hainbeste barruti judizialetan kokatuta daudenak: Azpeitia, Bergara, Donostia, Eibar, Irun eta Tolosa. Areto horiek antzeko funtzionamendua dute, baina epaitegi bakoitzaren ezaugarrietara eta lan kopurura egokitua.

3. Amaiera Konbentzionalaren lege-oinarria

24. Lehiaren Defentsari buruzko Legearen 52. artikulua ezartzen duenez, Lehiaren Batzorde Nazionalaren (LBN) Kontseiluak —egungo Merkatuen eta Lehiaren Batzorde Nazionalak (MLBN)—, Ikerketa Zuzendaritzak proposatuta, debekatutako akordio eta praktiken inguruko zehapen-prozedura amaitzea ebatzi ahal izango du, baldin eta ustezko arau-hausleek espedientearen xede diren jokabideetatik eratorritako **lehiaren gaineko eraginak konpontzen dituzten konpromisoak** proposatzen dituztenean eta **interes publikoa behar beste bermatzen bada**.

Konpromiso horiek lotesleak izango dira eta prozedurari amaiera ematen dion ebazpenean jasotzen direnetik aurrera izango dituzte ondorioak. Prozedura ezin izango da artikulua honetan zehazten den moduan amaitu, LDLren 50.4. artikuluan aurreikusitako proposamen-txostena aurkeztu eta gero.

Lehiaren Defentsari buruzko Legearen aipatu 52. artikulua garatuz, otsailaren 22ko 261/2008 Errege Dekretuak onartutako Lehiaren Defentsari buruzko Erregelamenduaren 39. artikulua ezartzen du Ikerketa Zuzendaritzak, proposatutako txostena aurkeztu aurreko edozein unetan eta debekatutako jokabideak izan dituztenek proposatuta, debekatutako akordio eta praktiken inguruko zehapen-prozedura bat itunduta amaitzeko jardunen hasiera erabaki ahal izango duela. Itundutako amaiera hasteari buruzko erabaki hori interesdunei jakinaraziko zaie. Halaber, prozeduraren gehieneko epearen zenbaketa itundutako amaierara arte etenda geratu den adieraziko zaie.

Ustezko arau-hausleek Ikerketa Zuzendaritzari aurkeztuko diote konpromiso-proposamena, Zuzendaritza horrek amaiera konbentzionalaren hasierari buruzko erabakian finkatzen duen epean. Epe hori, edonola ere, hiru hilabetekoa izango da gehienez. Proposamen hori Kontseiluari eta interesdunei

⁷ Prozedura Zibilari buruzko Legearen 26.2.9 artikulua.



helaraziko zaie, jakinaren gainean gera daitezen eta bidezkoztat jotzen dituzten alegazio guztiak egin ahal izan ditzaten.

Ondoren, Ikerketa Zuzendaritzak amaiera konbentzionalaren proposamena aurkeztuko dio Kontseiluari, proposamena hartu eta prozedurari amaiera emango dion ebazpenean txerta dezan. Amaiera konbentzionalaren proposamena jaso ondoren, Kontseiluak aukera izango du:

a) Zehapen-espeditentea itundutako amaiera bidez ebazteko (aurkeztutako konpromisoak egokitzat hartuta).

b) Aurkeztutako konpromisoek espedientearen xede diren jokabideek lehiari izandako ondorioak behar bezala konpontzen ez dituztela, edota interes publikoa behar bezala bermatzen ez dutela ebazteko. Kasu horretan, epe bat eman ahal izango du, ustezko arau-hausleek Lehiaren Batzorde Nazionalaren Kontseiluari ikusitako arazoak konponduko dituzten konpromiso berriak aurkez diezazkiten. Epe hori igaro ondoren ustezko arau-hausleek konpromiso berririk aurkeztu ezean, eskaeran atzera egin dutela ulertuko da, eta Lehiaren Batzorde Nazionalaren Kontseiluak zehapen-prozedurarekin jarraitzeko eskatuko dio Ikerketa Zuzendaritzari.

25. Lehiaren Defentsari buruzko legearen zortzigarren xedapen gehigarriaren arabera, Lege honetan Lehiaren Batzorde Nazionalari eta bertako zuzendaritza-organoei buruz egiten diren erreferentziak, hain zuzen ere eginkizun, administrazio-ahalmen eta prozedurei buruzkoak, autonomia-erkidegoetan arlo horretako eskumenak dituzten instrukzio- eta ebazpen-organoei buruzkoak ere badirela ulertuko da, erreferentzia horiek lege honen 13. artikuluan aurreikusitako eskumenen ingurukoak direnean. Horregatik Lehiaren Euskal Kontseiluak Amaiera Konbentzionala erabakitzeko eskumena du.

26. Lehiaren Defentsarako Legeak ez du eskatzen prozedura bati amaiera konbentzionalaren bidez amaiera ematen dion prozedura batek espedienteko interesdun guztien adostasuna izatea.

Horrela, zioen azalpenak, amaiera konbentzionalari buruzko paragrafoan, honako hau dio:

Arlo horretan, aipatu beharrekoa da itundutako amaieraren erregimena malgutu egin dela, eta ondorengoetan zentratzen dela: ustezko arau-hausleak proposatu beharreko konpromisoetan, Ikerketa Zuzendaritzarekiko negoziazioan, eta Kontseiluari aurkeztu beharreko ebazpen-proposamenean; ebazpen-proposamena beti proposamen-txostena baino lehen aurkeztu beharko da, eta espedientearen interesatuak diren gainontzekoen adostasunik gabe ere onartzeko aukera egongo da.

4. Elkargoak aurkeztutako konpromisoak

27. IZk LEK honi Amaiera Konbentzionalaren proposamena bidali dio 03/2013, GIPUZKOAKO PROKURADOREAK zehapen-espeditenteari dagokionez. Bertan, IZk uste du Elkargoak formulatutako konpromisoek aurkitu diren lehia-



arazoak konpontzen dituztela, interes publikoa behar bezala bermatuta geratuz. Horregatik LEKri proposatzen dio aurkeztu diren konpromisoak onartzen dituen Ebazpena ematea eta zehapen-espediteari amaiera ematea amaiera konbentzionalaren bitartez.

LEK bat dator iritzi horrekin, uste baitu zehapen-prozeduraren amaiera konbentzionalerako proposatutako konpromisoen edukia egiaztatu ziren lehiaren murrizketak gainditzeko gai dela, interes publikoa behar beste bermatuta geratuz.

Deskribatutako jokabideak lehia-arazoak sortzen ditu lanbide baten egikaritza justifikaziorik gabe murrizten duelako, Jakinarazpen Zerbitzua finantzatzeko kuota finko bat ezartzen duelako prokuradoreek eta prozedurek sortutako lan-karga kontuan izan gabe.

Jakinarazpen Zerbitzuaren finantzaketaren aldaketak, zenbatekoen justifikazioa egiaztatzea ahalbidetzen duen metodologia bat ezarriz, etorkizuneko berrikuspenen gardentasuna ekartzeaz gain, aurkitutako lehia-arazoak argi eta garbi konpontzen ditu.

Gainera, hori betetzen dela eta konpromisoak eraginkorrak direla zaintzea bideragarria eta efikaza da.

28. I.R.E.ren alegazioari dagokionez, zeinaren indarrez EEren zenbatekoa ez litzaikeen kobratu behar Gipuzkoako Elkargoan izena emanda ez dauden prokuradoreei, ondorioztatu behar da jokabide horrek justifikatu gabeko tratamendu diskriminatzailea eragingo lukeela, eta beraz onartu egin daiteke.

29. Ebazpen honen eta berari lotutako konpromiso erantsien **publizitatea** jakinarazpena jasotzen den egunaren biharamunetik zenbatzen hasi eta gehienez bi hilabeteko epearen barruan egin behar da. Argitalpenak gutxienez ere hamabi hilabetez egon beharko du ipinita.

Batetik, Elkargoak bere kideetako bakoitzari modu indibidualizatuan jakinarazi beharko dio ebazpen honen edukia, baita ebazpenari lotutako konpromisoen edukia ere.

Bestetik, Elkargoak bere webgunean (gaur egun <http://www.procuradoresvizcaya.com/>) ikusgai dagoen toki batean argitaratu beharko du ebazpen honen edukia, baita ebazpenari lotutako konpromisoen edukia ere.

30. Lehiaren Defentsari buruzko Erregelamenduaren 39.7 artikuluari jarraiki, amaiera konbentzionaleko ebazpen batean bildutako konpromisoak eta betebeharrak **ez betetzea** arau-hauste oso larritzat hartuko da, Lehiaren Defentsarako Legearen 64.4.c artikuluan ezarritakoaren arabera. Halaber,



behartzeko isunak ezarri eta, hala badagokio, zehapen-espeditante bat ireki ahal izango da Lehiaren Defentsari buruzko Legearen 1., 2. edo 3. artikulua urratzeagatik.

Lehiaren Euskal Kontseilu honek, arestian azaldutakoa kontuan hartuta, honako hau,

IV. EBATZI DU:

LEHENA.- "Gipuzkoako Prokuradoreen Elkargoa zehapen-prozeduraren" amaiera konbentzionala erabakitzea izaera loteslearekin, Lehiaren Defentsari buruzko 15/2007 Legearen 52. artikuluan aurreikusitakoaren arabera, prozeduren arabera jakinarazpenen zenbaketa eta ondorioz jakinarazpen bakoitzarengatik kobratzea ezinezkoa den bitartean.

Horretarako, ebazpen honen Eranskinen bildu diren Elkargoak proposatutako konpromisoak kontuan izango dira.

BIGARRENA.- Elkargoak ebazpen honen Eranskinen Konpromiso Proposamenean bildutako betebeharrak bete beharko dituela erabakitzea, amaiera konbentzionalari buruzko erabakia behar bezala beteko dela ziurtatzeko.

HIRUGARRENA.- Ikerketa Zuzendaritzari amaiera konbentzionalari buruzko erabakia eta, beraz, lortutako konpromisoak eta ezarritako betebeharrak zaintzeko ardura ematea.

Jakinaraz bekio Ebazpen hau Ikerketa Zuzendaritzari, eta jakinaraz bekie Gipuzkoako Prokuradoreen Elkargoari eta gainerako interesdunei, eta adierazi behar zaie Ebazpen honek administrazio-bidea amaitzen duela, eta administrazioarekiko auzi-errekurtsoa ipin dezaketela EAEko Justizia Auzitegi Nagusiko Administrazioarekiko Auzien Salan, aipatu jakinarazpenetik hasi eta bi hilabeteko epean.

LEHENDAKARIA

MARIA PILAR CANEDO ARRILLAGA

IDAZKARIA

IBON ALVAREZ CASADO

KIDEA

NATIVIDAD GOÑI URRIZA

KIDEA

RAFAEL ITURRIAGA NIEVA



Eranskina

ELKARGOAREN KONPROMISOAK

Lehena.- Prokuradore bakoitzak prozeduretan egiten duen jardunaren ondorioz jakinarazpen-zerbitzua erabiltzeagatik ordaindu behar duen kontraprestazioa ezartzea honako metodologia honen arabera:

Prozedura judicial bakoitzaren araberako jardunagatiko ordainketa-sistema bat ezartzea erabaki da, horretarako normalki sortzen dituen jakinarazpenen bolumena kontuan izanik, eta horretarako honako sailkapen hau egitea beharrezkoa da:

1. Jurisdikzio zibila eta merkataritzakoa

Prozedura Monitorioa, Ahozkoa eta Kautela Neurriak

Epaiketa Arrunta, Kanbio Epaiketa eta Betearazpenak

Hartzekodunen konkurtsoa

Borondatezko jurisdikzioa, ezkontza-jurisdikzioa eta gainerako prozedura zibilak

2. Zigor-arloko jurisdikzioa

Falta-epaiketak

Aurretiazko Eginbideak, Prozedura Laburtua eta gainerako prozedurak

3. Administrazioarekiko auzien jurisdikzioa

Prozedura laburtua, Arrunta eta Bereziak

Prozedura bakoitzeko ekarpena kalkulatzeko honako eragiketa hau egiten dugu:

Prozedura bakoitzean lerrun bakoitzeko jakinarazpenen batez besteko kopurua hartzen da.

Prozedura bakoitzeko jakinarazpenen batez besteko kopurua prozedura kopuruarekin biderkatzen da, era horretan jakinarazpenen guztizko kopurua lortuz.

Jakinarazpen-aretoetan aurrekontuan sartutako gastua kalkulatzeko den jakinarazpenen kopuruarekin zatitzen da, eta jakinarazpen bakoitzaren kostua lortzen da.



Kostuaren balio hori lerrun bakoitzaren batez besteko kopuruarekin biderkatzen da, baita dispertsio-koefizientearekin ere, hori balego. Balio horiek unitatera hurbilduz prozedura bakoitzeko ekarpenaren kostua lortzen da. Azalpena:

Jkp = jakinarazpenen batez besteko kopurua lerruneko eta prozedurako

Pk = prozedura kopurua

JzK = Jakinarazpen Zerbitzuaren Kostua

Jkb = Jakinarazpen-zerbitzuaren kostu balioetsia

D ko = Dispertsio-koefizientea

EE = Esku-hartzeagatiko ekarpena

$$JzK / (Jkp * Pk) = Jkb$$

$$Jkb * Jkp * D ko = EE \text{ (unitatera hurbildua)}$$

Azalpenean balioetsitako datu estatistikoekin, Prokuradore bakoitzak prozeduretan egiten duen jardunaren ondorioz jakinarazpen-zerbitzua erabiltzeagatik ordaindu behar duen kontraprestazioa ezartzen da, honako eskala honen arabera:

a) Jurisdikzio zibila eta merkataritzakoa.

Prozedura Monitorioa, Ahozkoa eta Kautela Neurriak: 2 €

Epaiketa Arrunta, Kanbio Epaiketa eta Betearazpenak: 7 €

Hartzekodunen konkurtsoa: 12 €

Borondatezko jurisdikzioa, ezkontza-jurisdikzioa eta gainerako prozedura zibilak: 4 €

b) Jurisdikzio Penala.

Falta-epaiketak: 2 €

Aurretiazko Eginbideak, Prozedura Laburtua eta beste batzuk: 3 €

c) Administrazioarekiko auzien jurisdikzioa.

Prozedura laburtua, Arrunta eta Bereziak: 4 €

Bigarrena.- Jakinarazpenen elkargo-zerbitzua erabiltzeagatik Esku-hartzeagatiko Ekarpina ezartzeko sistema berria onartzeko aurkeztea Elkargoaren Batzar Orokorrari, LEAk dagokion Ebazpena ematen duenetik zenbatzen hasi eta 2 hilabeteko epean.

Hirugarrena.- Urtero, Elkargoaren Batzar Okorrrak, Gobernu Batzordeak egindako proposamenez, jakinarazpen-zerbitzua erabiltzeagatiko kontraprestazioaren zenbatekoa eguneratu ahal izango du lehen konpromisoan ezarritako metodologiaren arabera, eta beharrezkoa izanez gero, eta alde



aurretik dagokion azterlana egin ondoren, prozeduren eskalak aldatu ahal izango ditu, jakinarazpen-zerbitzuaren autosufizientzia bermatzeko, sistemaren gastuen eta sarreren bilakaera kontuan izanik, eta justifikazioan azaldutako jarraibideak betez. Horretarako, berrikuspen horiek, onartuak izan baino lehen, Lehiaren Euskal Agintaritzari komunikatuko zaizkio aldeztu aurretik, jakinarazpen judizialen zerbitzu telematikoaren inplementatzen ez den bitartean.

Laugarrena.- Jakinarazpenen elkargo-zerbitzua erabiltzeagatiko Esku-hartzeagatiko Ekarpena zehazteko araubide berria Batzar Orokorrak onartu eta bi hilabeteko epean aplikatzea, elkargoko finantzaketa-araubidean sartutako aldaketetara egokitu egin behar dela kontuan izanik.

Bosgarrena.- Batzar Orokorraren erabakia elkargoaren webgunean argitaratzea eta zirkular baten bitartez elkargokideei jakinaraztea; zirkularrean, esku-hartzeagatiko ekarpena kalkulatzeko metodoa eta Lehiaren Euskal Kontseiluak ematen duen Amaiera Konbentzionalaren Ebazpenaren testua osorik adierazi beharko dira.

Seigarrena.- Hartutako konpromisoak egikaritu direla egiaztatzen duen dokumentazioa Lehiaren Euskal Agintaritzara lekualdatzea, konpromisoak bete direla egiazta dezan.